



SIARAN MEDIA

KEMENTERIAN SAINS, TEKNOLOGI DAN INOVASI

CRADLE SUMBANG RM1.83 BIL KEPADA KDNK NEGARA, TINGKAT PERTUMBUHAN STARTUP TEMPATAN SELAMA 20 TAHUN

KUALA LUMPUR, 7 Ogos 2023 - Kementerian Sains, Teknologi dan Inovasi (MOSTI) hari ini mengumumkan Cradle Fund Sdn Bhd (Cradle), agensi focal point ekosistem startup Malaysia, telah menyumbang sebanyak RM1.83 bilion kepada KDNK negara melalui program geran dan pelaburan sejak penubuhannya pada tahun 2003.

Cradle telah memenuhi mandat utamanya, iaitu untuk membiayai usahawan startup tempatan dengan menyalurkan geran sebanyak RM255 juta kepada lebih 1,000 usahawan. Penerima geran Cradle juga telah menyumbang RM830 juta kepada KDNK negara, yang mana mereka mencatat kadar pengkomersilan tertinggi dalam kalangan penyedia geran kerajaan pada 100% untuk geran pengkomersilan, dan 76% untuk program geran prototaip. Sehingga kini, penerima geran Cradle telah menyediakan lebih daripada 80,000 peluang pekerjaan.

Sementara itu, program pelaburan Cradle - Cradle Seed Ventures (CSV) dan DEQ800, telah menyumbang sebanyak RM1 bilion kepada KDNK negara melalui 43 portfolio pelaburan, dan memperoleh pelaburan susulan bernilai RM182 juta. Sehingga kini, usahawan yang dibiayai oleh program CSV dan DEQ800 telah menyediakan lebih daripada 1,000 pekerjaan.

Dalam usaha untuk memastikan kelangsungan impak positif, mandat Cradle telah dikembangkan melangkaui pembiayaan geran untuk meliputi program pembinaan kapasiti seperti Coach and Grow Programme (CGP) yang menawarkan bimbingan kepada startup peringkat awal. Sehingga kini, CGP telah memberi manfaat kepada lebih daripada 1,500 peserta melalui 5,000 jam sesi bimbingan.

Susulan pengumuman Pelan Hala Tuju Ekosistem Startup Malaysia (SUPER) 2021-2030, Cradle berperanan untuk membentuk dasar startup negara serta menyelia 16 intervensi komprehensif yang merangkumi lima (5) bidang utama, iaitu pembiayaan, bakat, inovasi, dasar dan peraturan serta ekosistem pasaran, dengan matlamat untuk menjadikan Malaysia sebagai salah satu daripada 20 ekosistem startup terbaik di dunia menjelang 2030.

MYStartup, komuniti dipacu data yang diperkenalkan oleh MOSTI dan digerakkan oleh Cradle, berfungsi sebagai salah satu intervensi di bawah SUPER 2021-2030 dengan matlamat untuk memacu pembangunan ekosistem startup negara. Sehingga kini, inisiatif MYStartup telah memberi manfaat kepada lebih 5,000 pemain industri. Portal MYStartup juga telah menerima lebih daripada 70,000 daripada lawatan (*website visits*), yang mana lebih daripada 4,000 merupakan pengguna berdaftar dan 3,500 startup.

Mengulas mengenai pencapaian Cradle, Menteri Sains, Teknologi dan Inovasi YB Chang Lih Kang berkata pengiktirafan yang diperoleh Cradle melambangkan dedikasi tenaga kerjanya yang sentiasa berusaha untuk memartabatkan usahawan serta mendorong perkembangan ekosistem startup tempatan.

“Startup memainkan peranan penting dalam memacu inovasi negara, yang mana mereka sentiasa mencari ruang untuk mencipta norma baharu dan tidak gentar pada risiko. Daya tahan dan kecekapan mereka terbukti di mana mereka berjaya mengharungi pandemik COVID-19 dan muncul dengan produk-produk yang lebih berinovatif. Dengan itu, jelas bahawa Cradle merupakan nadi kepada kejayaan ini, dan saya percaya, agensi

ini akan terus memupuk ekosistem startup yang dinamik serta mendorong pertumbuhan startup peringkat awal,” katanya, sempena Majlis Sambutan Ulang Tahun Cradle ke-20.

Norman Matthieu Vanhaecke, Pemangku Ketua Pegawai Eksekutif Kumpulan Cradle, berkata bahawa mandat-mandat yang telah diamanahkan kepada Cradle mencerminkan keyakinan serta keupayaan agensi ini untuk menerajui pembangunan usahawan startup peringkat awal serta mengukuhkan ekosistem tempatan.

“Kami sedar bahawa kecekapan usahawan startup harus dipupuk selari dengan perkembangan teknologi dunia, bersesuaian dengan peningkatan keperluan pendanaan mereka. Oleh itu, mandat yang diamanahkan kepada Cradle telah diselarikan untuk mewujudkan pendekatan sinergi yang membolehkan usahawan startup ini berkembang maju melalui integrasi yang lancar yang juga akan memaksimumkan potensi mereka. Pendekatan ini juga diharap dapat membantu usahawan startup untuk mengharungi cabaran industri, menyumbang kepada pembangunan ekonomi negara serta mencipta lebih banyak peluang pekerjaan,” katanya.

Bertemakan “20 Tahun dalam Memangkin Impak dan Inspirasi Pertumbuhan”, Cradle telah menganjurkan majlis penghargaan untuk meraikan ahli-ahli Cradle dan pemain industri yang telah menyumbang kepada kejayaan ekosistem startup negara. Sebanyak empat (4) buah anugerah telah diberikan ketika majlis sambutan tersebut dengan kategori - Pengasas Wanita Terbaik (Best Female Founder), Pengasas Lelaki Terbaik (Best Male Founder), Bakal Startup Berjaya (Most Promising Startup) dan Anugerah Pilihan Cradle (Cradle Startup Choice).

Kategori Anugerah	Penerima-Penerima
Pengasas Wanita Terbaik (<i>Best Female Founder</i>)	Nadhra Fauzi Pengasas Bersama, TresGo Sdn Bhd (https://tresgo.my)

Pengasas Lelaki Terbaik (<i>Best Male Founder</i>)	Adrian Yap & Naysan Munusamy Pengasas, MoneyMatch (https://transfer.moneymatch.co/)
Bakal Startup Berjaya (<i>Most Promising Startup</i>)	Chai Kok Chin Pengasas, NEUON AI (https://neuon.ai)
Anugerah Pilihan Cradle (<i>Cradle Startup Choice</i>)	Jimmy How Pengasas, Involve Asia (https://involve.asia)

TAMAT

Disediakan oleh

KEMENTERIAN SAINS, TEKNOLOGI DAN INOVASI

7 Ogos 2023

Untuk maklumat lanjut, sila hubungi:

Elmy Fairuz Azmi

PR & Media

Komunikasi Strategik

Cradle Fund Sdn. Bhd. (Cradle)

+6012-271 3457

elmy@cradle.com.my

KIT MEDIA : <https://rb.gy/5cjbl>

1. Siaran Media
2. Gambar